
Shri Ram Charit Manas

श्री राम चरित मानस

Document Information

Text title : Shri Ram Charit Manas - Sundarakand

File name : manas5_i.itx

Category : raama, tulasIdAsa, hindi

Location : doc_z_otherlang_hindi

Author : Goswami Tulasidas

Transliterated by : Mr. Balram J. Rathore, Ratlam, M.P., a retired railway driver

Description-comments : Awadhi, Converted from ISCII to ITRANS

Acknowledge-Permission: Dr. Vineet Chaitanya

Latest update : Februari 13, 2024

Send corrections to : sanskrit at cheerful dot c om

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

Please help to maintain respect for volunteer spirit.

Please note that proofreading is done using Devanagari version and other language/scripts are generated using **sanscript**.

February 13, 2024

sanskritdocuments.org

श्री राम चरित मानस



श्रीजानकीवल्लभो विजयते

श्रीरामचरितमानस

SSSSSSSS

पञ्चम सोपान

सुन्दरकाण्ड

श्लोक

शान्तं शाश्वतमप्रमेयमनघं निर्वाणशान्तिप्रदं
ब्रह्माशम्भुफणीन्द्रसेव्यमनिशं वेदान्तवेद्यं विभुम् ।
रामाख्यं जगदीश्वरं सुरगुरुं मायामनुष्यं हरि
वन्देऽहं करुणाकरं रघुवरं भूपालचूडामणिम् ॥ १ ॥

नान्या स्पृहा रघुपते हृदयेऽस्मदीये
सत्यं वदामि च भवानखिलान्तरात्मा ।
भक्तिं प्रयच्छ रघुपुङ्गव निर्भरां मे
कामादिदोषरहितं कुरु मानसं च ॥ २ ॥

अतुलितबलधामं हेमशैलाभदेहं
दनुजवनकृशानुं ज्ञानिनामग्रगण्यम् ।
सकलगुणनिधानं वानराणामधीशं
रघुपतिप्रियभक्तं वातजातं नमामि ॥ ३ ॥

जामवंत के बचन सुहाए। सुनि हनुमंत हृदय अति भाए ॥
तब लागि मोहि परिखेहु तुम्ह भाई। सहि दुख कंद मूल फल खाई ॥
जब लागि आवौं सीतहि देखी। होइहि काजु मोहि हरष बिसेषी ॥
यह कहि नाइ सबन्हि कहूँ माथा। चलेउ हरषि हियँ धरि रघुनाथा ॥
सिंधु तीर एक भूधर सुंदर। कौतुक कूदि चढेउ ता ऊपर ॥
बार बार रघुबीर सँभारी। तरकेउ पवनतनय बल भारी ॥

जेहिं गिरि चरन देइ हनुमंता । चलेउ सो गा पाताल तुरंता ॥
जिमि अमोघ रघुपति कर बाना । एही भौंति चलेउ हनुमाना ॥
जलनिधि रघुपति दूत विचारी । तैं मैनाक होहि श्रमहारी ॥

दो. हनूमान तेहि परसा कर पुनि कीन्ह प्रनाम ।

राम काजु कीन्हें विनु मोहि कहाँ विश्राम ॥ १ ॥

जात पवनसुत देवन्ह देखा । जानैं कहूँ बल बुद्धि बिसेषा ॥
सुरसा नाम अहिन्ह कै माता । पठइन्हि आइ कही तेहिं बाता ॥
आजु सुरन्ह मोहि दीन्ह अहारा । सुनत बचन कह पवनकुमारा ॥
राम काजु करि फिरि मैं आवौं । सीता कइ सुधि प्रभुहि सुनावौं ॥
तब तव बदन पैठिहउँ आई । सत्य कहउँ मोहि जान दे माई ॥
कबनेहुँ जतन देइ नहिं जाना । ग्रससि न मोहि कहेउ हनुमाना ॥
जोजन भरि तेहिं बदनु पसारा । कपि तनु कीन्ह दुगुन बिस्तारा ॥
सोरह जोजन मुख तेहिं ठयऊ । तुरत पवनसुत बत्तिस भयऊ ॥
जस जस सुरसा बदनु बढावा । तासु दून कपि रूप देखावा ॥
सत जोजन तेहिं आनन कीन्हा । अति लघु रूप पवनसुत लीन्हा ॥
बदन पइठि पुनि बाहेर आवा । मागा बिदा ताहि सिरु नावा ॥
मोहि सुरन्ह जेहि लागि पठावा । बुधि बल मरमु तोर मै पावा ॥

दो. राम काजु सबु करिहहु तुम्ह बल बुद्धि निधान ।

आसिष देह गई सो हरषि चलेउ हनुमान ॥ २ ॥

निसिचरि एक सिंधु महुँ रहई । करि माया नभु के खग गहई ॥
जीव जंतु जे गगन उडाहीं । जल बिलोकि तिन्ह कै परिछाहीं ॥
गहइ छाहँ सक सो न उडाई । एहि बिधि सदा गगनचर खाई ॥
सोइ छल हनूमान कहँ कीन्हा । तासु कपटु कपि तुरतहिं चीन्हा ॥
ताहि मारि मारुतसुत बीरा । बारिधि पार गयउ मतिधीरा ॥
तहाँ जाइ देखी बन सोभा । गुंजत चंचरीक मधु लोभा ॥
नाना तरु फल फूल सुहाए । खग मृग वृंद देखि मन भाए ॥
सैल बिसाल देखि एक आगें । ता पर धाइ चढेउ भय त्यागें ॥
उमा न कछु कपि कै अधिकारई । प्रभु प्रताप जो कालहि खाई ॥
गिरि पर चढि लंका तेहिं देखी । कहि न जाइ अति दुर्ग बिसेषी ॥
अति उतंग जलनिधि चहु पासा । कनक कोट कर परम प्रकासा ॥

छं=कनक कोट बिचित्र मनि कृत सुंदरायतना घना।
 चउहट्ट हट्ट सुवट्ट बीथीं चारु पुर बहु बिधि बना ॥
 गज बाजि खच्चर निकर पदचर रथ बरूथिन्ह को गने ॥
 बहुरूप निसिचर जूथ अतिबल सेन बरनत नहिं बनै ॥ १ ॥

बन बाग उपवन बाटिका सर कूप बापीं सोहहीं।
 नर नाग सुर गंधर्व कन्या रूप मुनि मन मोहहीं ॥
 कहूँ माल देह बिसाल सैल समान अतिबल गर्जहीं।
 नाना अखारेन्ह भिरहिं बहु बिधि एक एकन्ह तर्जहीं ॥ २ ॥

करि जतन भट कोटिन्ह बिकट तन नगर चहुँ दिसि रच्छहीं।
 कहूँ महिष मानषु धेनु खर अज खल निसाचर भच्छहीं ॥
 एहि लागि तुलसीदास इन्ह की कथा कछु एक है कही।
 रघुबीर सर तीरथ सरीरन्हि त्यागि गति पैहहिं सही ॥ ३ ॥

दो. पुर रखवारे देखि बहु कपि मन कीन्ह बिचार।

अति लघु रूप धरौं निसि नगर करौं पइसार ॥ ३ ॥

मसक समान रूप कपि धरी। लंकहि चलेउ सुमिरि नरहरी ॥
 नाम लंकिनी एक निसिचरी। सो कह चलेसि मोहि निंदरी ॥
 जानेहि नहीं मरमु सठ मोरा। मोर अहार जहाँ लागि चोरा ॥
 मुठिका एक महा कपि हनी। रुधिर बमत धरनीं ढनमनी ॥
 पुनि संभारि उठि सो लंका। जोरि पानि कर बिनय संसका ॥
 जब रावनहि ब्रह्म बर दीन्हा। चलत विरंचि कहा मोहि चीन्हा ॥
 बिकल होसि तैं कपि कैं मारे। तब जानेसु निसिचर संघारे ॥
 तात मोर अति पुन्य बहूता। देखेउँ नयन राम कर दूता ॥

दो. तात स्वर्ग अपवर्ग सुख धरिअ तुला एक अंग।

तूल न ताहि सकल मिलि जो सुख लव सतसंग ॥ ४ ॥

प्रबिसि नगर कीजे सब काजा। हृदयँ राखि कौसलपुर राजा ॥
 गरल सुधा रिपु करहिं मिताई। गोपद सिंधु अनल सितलाई ॥
 गरूड सुमेरु रेनू सम ताही। राम कृपा करि चितवा जाही ॥
 अति लघु रूप धरेउ हनुमाना। पैठा नगर सुमिरि भगवाना ॥
 मंदिर मंदिर प्रति करि सोधा। देखे जहँ तहँ अगनित जोधा ॥
 गयउ दसानन मंदिर माहीं। अति बिचित्र कहि जात सो नाहीं ॥

सयन किए देखा कपि तेही। मंदिर महुँ न दीखि बैदेही ॥
भवन एक पुनि दीख सुहावा। हरि मंदिर तहँ भिन्न बनावा ॥

दो. रामायुध अंकित गृह सोभा बरनि न जाइ।
नव तुलसिका बृंद तहँ देखि हरषि कपिराइ ॥ ५ ॥

लंका निसिचर निकर निवासा। इहाँ कहाँ सज्जन कर बासा ॥
मन महुँ तरक करै कपि लागा। तेहीं समय बिभीषणु जागा ॥
राम राम तेहिं सुमिरन कीन्हा। हृदयँ हरष कपि सज्जन चीन्हा ॥
एहि सन हठि करिहउँ पहिचानी। साधु ते होइ न कारज हानी ॥
बिप्र रूप धरि बचन सुनाए। सुनत बिभीषण उठि तहँ आए ॥
करि प्रनाम पूँछी कुसलाई। बिप्र कहहु निज कथा बुझाई ॥
की तुम्ह हरि दासन्ह महुँ कोई। मोरें हृदय प्रीति अति होई ॥
की तुम्ह रामु दीन अनुरागी। आयहु मोहि करन बडभागी ॥

दो. तब हनुमंत कही सब राम कथा निज नाम।
सुनत जुगल तन पुलक मन मगन सुमिरि गुन ग्राम ॥ ६ ॥

सुनहु पवनसुत रहनि हमारी। जिमि दसनन्हि महुँ जीभ बिचारी ॥
तात कबहुँ मोहि जानि अनाथा। करिहहिं कृपा भानुकुल नाथा ॥
तामस तनु कछु साधन नाही। प्रीति न पद सरोज मन माहीं ॥
अब मोहि भा भरोस हनुमंता। विनु हरिकृपा मिलहिं नहिं संता ॥
जौ रघुवीर अनुग्रह कीन्हा। तौ तुम्ह मोहि दरसु हठि दीन्हा ॥
सुनहु बिभीषण प्रभु कै रीती। करहिं सदा सेवक पर प्रीती ॥
कहहु कवन मैं परम कुलीना। कपि चंचल सबहीं बिधि हीना ॥
प्रात लेइ जो नाम हमारा। तेहि दिन ताहि न मिलै अहारा ॥

दो. अस मैं अधम सखा सुनु मोहू पर रघुवीर।
कीन्ही कृपा सुमिरि गुन भरे बिलोचन नीर ॥ ७ ॥

जानतहूँ अस स्वामि बिसारी। फिरहिं ते काहे न होहिं दुखारी ॥
एहि विधि कहत राम गुन ग्रामा। पावा अनिर्वाच्य विश्रामा ॥
पुनि सब कथा बिभीषण कही। जेहि बिधि जनकसुता तहँ रही ॥
तब हनुमंत कहा सुनु भ्राता। देखी चहउँ जानकी माता ॥
जुगुति बिभीषण सकल सुनाई। चलेउ पवनसुत बिदा कराई ॥
करि सोइ रूप गयउ पुनि तहवाँ। बन असोक सीता रह जहवाँ ॥

देखि मनहि महुँ कीन्ह प्रनामा। बैठेहि बीति जात निसि जामा ॥
कृस तन सीस जटा एक बेनी। जपति हृदयँ रघुपति गुन श्रेनी ॥

दो. निज पद नयन दिऐँ मन राम पद कमल लीन।
परम दुखी भा पवनसुत देखि जानकी दीन ॥ ८ ॥

तरु पल्लव महुँ रहा लुकाई। करइ विचार करौँ का भाई ॥
तेहि अवसर रावनु तहँ आवा। संग नारि बहु किरँ बनावा ॥
बहु विधि खल सीतहि समुझावा। साम दान भय भेद देखावा ॥
कह रावनु सुनु सुमुखि सयानी। मंदोदरी आदि सब रानी ॥
तव अनुचरीं करउँ पन मोरा। एक बार बिलोकु मम ओरा ॥
तृन धरि ओट कहति बैदेही। सुमिरि अवधपति परम सनेही ॥
सुनु दसमुख खद्योत प्रकासा। कबहुँ कि नलिनी करइ विकासा ॥
अस मन समुझ कहति जानकी। खल सुधि नहिँ रघुबीर बान की ॥
सठ सूने हरि आनेहि मोहि। अधम निलज्ज लाज नहिँ तोही ॥

दो. आपुहि सुनि खद्योत सम रामहि भानु समान।
परुष बचन सुनि काटि असि बोला अति खिसिआन ॥ ९ ॥

सीता तैं मम कृत अपमाना। कटिहउँ तव सिर कठिन कृपाना ॥
नाहिँ त सपदि मानु मम बानी। सुमुखि होति न त जीवन हानी ॥
स्याम सरोज दाम सम सुंदर। प्रभु भुज करि कर सम दसकंधर ॥
सो भुज कंठ कि तव असि घोरा। सुनु सठ अस प्रवान पन मोरा ॥
चंद्रहास हरु मम परितापं। रघुपति बिरह अनल संजातं ॥
सीतल निसित बहसि बर धारा। कह सीता हरु मम दुख भारा ॥
सुनत बचन पुनि मारन धावा। मयतनयाँ कहि नीति बुझावा ॥
कहोसि सकल निसिचरिन्ह बोलाई। सीतहि बहु विधि त्रासहु जाई ॥
मास दिवस महुँ कहा न माना। तौ मैं मारबि काटि कृपाना ॥

दो. भवन गयउ दसकंधर इहाँ पिसाचिनि वृंद।
सीतहि त्रास देखावहि धरहिँ रूप बहु मंद ॥ १० ॥

त्रिजटा नाम राच्छसी एका। राम चरन रति निपुन बिबेका ॥
सबन्हौ बोलि सुनार्षसि सपना। सीतहि सेइ करहु हित अपना ॥
सपनें बानर लंका जारी। जातुधान सेना सब मारी ॥
खर आरूढ नगन दससीसा। मुंडित सिर खंडित भुज बीसा ॥

एहि विधि सो दच्छिन दिसि जाई। लंका मनहुँ बिभीषन पाई ॥
 नगर फिरी रघुवीर दोहाई। तब प्रभु सीता बोलि पठाई ॥
 यह सपना में कहउँ पुकारी। होइहि सत्य गएँ दिन चारी ॥
 तासु बचन सुनि ते सब डरीं। जनकसुता के चरनन्हि परीं ॥
 दो. जहाँ तहाँ गई सकल तब सीता कर मन सोच।

मास दिवस बीतें मोहि मारिहि निसिचर पोच ॥ ११ ॥

त्रिजटा सन बोली कर जोरी। मातु बिपति संगिनि तैं मोरी ॥
 तजौं देह करु बेगि उपाई। दुसहु बिरहु अब नहिँ सहि जाई ॥
 आनि काठ रचु चिता बनाई। मातु अनल पुनि देहि लगाई ॥
 सत्य करहि मम प्रीति सयानी। सुनै को श्रवन सूल सम बानी ॥
 सुनत बचन पद गहि समुझाएसि। प्रभु प्रताप बल सुजसु सुनाएसि ॥
 निसि न अनल मिल सुनु सुकुमारी। अस कहि सो निज भवन सिधारी ॥
 कह सीता विधि भा प्रतिकूला। मिलहि न पावक मिटिहि न सूला ॥
 देखिअत प्रगट गगन अंगारा। अविनि न आवत एकउ तारा ॥
 पावकमय ससि स्रवत न आगी। मानहुँ मोहि जानि हतभागी ॥
 सुनहि बिनय मम बिटप असोका। सत्य नाम करु हरु मम सोका ॥
 नूतन किसलय अनल समाना। देहि अगिनि जनि करहि निदाना ॥
 देखि परम बिरहाकुल सीता। सो छन कपिहि कलप सम बीता ॥

सो. कपि करि हृदयँ बिचार दीन्हि मुद्रिका डारी तब।

जनु असोक अंगार दीन्हि हरषि उठि कर गहेउ ॥ १२ ॥

तब देखी मुद्रिका मनोहर। राम नाम अंकित अति सुंदर ॥
 चकित चितव मुदरी पहिचानी। हरष बिषाद हृदयँ अकुलानी ॥
 जीति को सकइ अजय रघुराई। माया तें असि रचि नहिँ जाई ॥
 सीता मन बिचार कर नाना। मधुर बचन बोलेउ हनुमाना ॥
 रामचंद्र गुन बरनैँ लागा। सुनतहिँ सीता कर दुख भागा ॥
 लागीं सुनैँ श्रवन मन लाई। आदिहु तें सब कथा सुनाई ॥
 श्रवनामृत जेहिँ कथा सुहाई। कहि सो प्रगट होति किन भाई ॥
 तब हनुमंत निकट चलि गयऊ। फिरि बैँठीं मन बिसमय भयऊ ॥
 राम दूत मैँ मातु जानकी। सत्य सपथ करुनानिधान की ॥
 यह मुद्रिका मातु मैँ आनी। दीन्हि राम तुम्ह कहँ सहिदानी ॥

नर बानरहि संग कहूँ कैसें। कहि कथा भइ संगति जैसें ॥

दो. कपि के बचन सप्रेम सुनि उपजा मन बिस्वास ॥

जाना मन क्रम बचन यह कृपासिंधु कर दास ॥ १३ ॥

हरिजन जानि प्रीति अति गाढी। सजल नयन पुलकावलि बाढी ॥
 बूडत विरह जलधि हनुमाना। भयउ तात मों कहूँ जलजाना ॥
 अब कहूँ कुसल जाऊँ बलिहारी। अनुज सहित सुख भवन खरारी ॥
 कोमलचित कृपाल रघुराई। कपि केहि हेतु धरी निठुराई ॥
 सहज बानि सेवक सुख दायक। कबहुँक सुरति करत रघुनायक ॥
 कबहुँ नयन मम सीतल ताता। होइहहि निरखि स्याम मृदु गाता ॥
 बचनु न आव नयन भरे बारी। अहह नाथ हों निपट बिसारी ॥
 देखि परम विरहाकुल सीता। बोला कपि मृदु बचन विनीता ॥
 मातु कुसल प्रभु अनुज समेता। तव दुख दुखी सुकृपा निकेता ॥
 जनि जननी मानहु जियँ ऊना। तुम्ह ते प्रेमु राम कें दूना ॥

दो. रघुपति कर संदेसु अब सुनु जननी धरि धीर।

अस कहि कपि गद गद भयउ भरे बिलोचन नीर ॥ १४ ॥

कहेउ राम बियोग तव सीता। मो कहूँ सकल भए बिपरीता ॥
 नव तरु किसलय मनहुँ कृसानू। कालनिसा सम निसि ससि भानू ॥
 कुबलय बिपिन कुंत बन सरिसा। बारिद तपत तेल जनु बरिसा ॥
 जे हित रहे करत तेइ पीरा। उरग स्वास सम त्रिविध समीरा ॥
 कहेहूँ तें कछु दुख घटि होई। काहि कहौँ यह जान न कोई ॥
 तत्त्व प्रेम कर मम अरु तोरा। जानत प्रिया एकु मनु मोरा ॥
 सो मनु सदा रहत तोहि पाहीं। जानु प्रीति रसु एतेनहि माहीं ॥
 प्रभु संदेसु सुनत बैदेही। मगन प्रेम तन सुधि नहिं तेही ॥
 कह कपि हृदयँ धीर धरु माता। सुमिरु राम सेवक सुखदाता ॥
 उर आनहु रघुपति प्रभुताई। सुनि मम बचन तजहु कदराई ॥

दो. निसिचर निकर पतंग सम रघुपति बान कृसानु।

जननी हृदयँ धीर धरु जरे निसाचर जानु ॥ १५ ॥

जौं रघुबीर होति सुधि पाई। करते नहिं बिलंबु रघुराई ॥
 रामबान रवि उएँ जानकी। तम बरूथ कहँ जातुधान की ॥
 अबहिं मातु मैं जाऊँ लवाई। प्रभु आयसु नहिं राम दोहाई ॥

कछुक दिवस जननी धरु धीरा। कपिन्ह सहित अइहहिं रघुबीरा ॥
 निस्चिचर मारि तोहि लै जैहहिं। तिहुँ पुर नारदादि जसु गैहहिं ॥
 हैं सुत कपि सब तुम्हहि समाना। जातुधान अति भट बलवाना ॥
 मोरें हृदय परम संदेहा। सुनि कपि प्रगट कीन्ह निज देहा ॥
 कनक भूधराकार सरीरा। समर भयंकर अतिबल बीरा ॥
 सीता मन भरोस तब भयऊ। पुनि लघु रूप पवनसुत लयऊ ॥

दो. सुनु माता साखामृग नहिं बल बुद्धि बिसाल।

प्रभु प्रताप तें गरुडहि खाइ परम लघु ब्याल ॥ १६ ॥

मन संतोष सुनत कपि बानी। भगति प्रताप तेज बल सानी ॥
 आसिष दीन्हि रामप्रिय जाना। होहु तात बल सील निधाना ॥
 अजर अमर गुननिधि सुत होहू। करहुँ बहुत रघुनायक छोहू ॥
 करहुँ कृपा प्रभु अस सुनि काना। निर्भर प्रेम मगन हनुमाना ॥
 बार बार नाएसि पद सीसा। बोला बचन जोरि कर कीसा ॥
 अब कृतकृत्य भयउँ मैं माता। आसिष तव अमोघ बिख्याता ॥
 सुनहु मातु मोहि अतिसय भूखा। लागि देखि सुंदर फल रूखा ॥
 सुनु सुत करहिं बिपिन रखवारी। परम सुभट रजनीचर भारी ॥
 तिन्ह कर भय माता मोहि नाहीं। जौं तुम्ह सुख मानहु मन माहीं ॥

दो. देखि बुद्धि बल निपुन कपि कहेउ जानकीं जाहु।

रघुपति चरन हृदयँ धरि तात मधुर फल खाहु ॥ १७ ॥

चलेउ नाइ सिरु पैठेउ बागा। फल खाएसि तरु तौरें लागा ॥
 रहे तहाँ बहु भट रखवारे। कछु मारेसि कछु जाइ पुकारे ॥
 नाथ एक आवा कपि भारी। तेहिं असोक बाटिका उजारी ॥
 खाएसि फल अरु बिटप उपारे। रच्छक मर्दि मर्दि महि डारे ॥
 सुनि रावन पठए भट नाना। तिन्हहि देखि गर्जेउ हनुमाना ॥
 सब रजनीचर कपि संघारे। गए पुकारत कछु अधमारे ॥
 पुनि पठयउ तेहिं अच्छकुमारा। चला संग लै सुभट अपारा ॥
 आवत देखि बिटप गहि तर्जा। ताहि निपाति महाधुनि गर्जा ॥

दो. कछु मारेसि कछु मर्देसि कछु मिलएसि धरि धूरि।

कछु पुनि जाइ पुकारे प्रभु मर्कट बल भूरि ॥ १८ ॥

सुनि सुत बध लंकेस रिसाना। पठएसि मेघनाद बलवाना ॥

मारसि जनि सुत बांधेसु ताही। देखिअ कपिहि कहाँ कर आही ॥
 चला इंद्रजित अतुलित जोधा। बंधु निधन सुनि उपजा क्रोधा ॥
 कपि देखा दारुन भट आवा। कटकटाइ गर्जा अरु धावा ॥
 अति बिसाल तरु एक उपारा। बिरथ कीन्ह लंकेस कुमारा ॥
 रहे महाभट ताके संग्गा। गहि गहि कपि मर्दइ निज अंगा ॥
 तिन्हहि निपाति ताहि सन बाजा। भिरे जुगल मानहुँ गजराजा।
 मुठिका मारि चढा तरु जाई। ताहि एक छन मुरुछा आई ॥
 उठि बहोरि कीन्हिसि बहु माया। जीति न जाइ प्रभंजन जाया ॥

दो. ब्रह्म अस्त्र तेहिँ साँधा कपि मन कीन्ह विचार।

जौं न ब्रह्मसर मानउँ महिमा मिटइ अपार ॥ १९ ॥

ब्रह्मवान कपि कहूँ तेहि मारा। परतिहुँ बार कटकु संघारा ॥
 तेहि देखा कपि मुरुछित भयऊ। नागपास बाँधेसि लै गयऊ ॥
 जासु नाम जपि सुनहु भवानी। भव बंधन काटहिं नर ग्यानी ॥
 तासु दूत कि बंध तरु आवा। प्रभु कारज लागि कपिहिँ बाँधावा ॥
 कपि बंधन सुनि निसिचर धाए। कौतुक लागि सभाँ सब आए ॥
 दसमुख सभा दीखि कपि जाई। कहि न जाइ कछु अति प्रभुताई ॥
 कर जोरें सुर दिसिप विनीता। भृकुटि बिलोकत सकल सभैता ॥
 देखि प्रताप न कपि मन संका। जिमि अहिगन महुँ गरुड असंका ॥

दो. कपिहि बिलोकि दसानन बिहसा कहि दुर्वाद।

सुत बध सुरति कीन्हि पुनि उपजा हृदयँ विषाद ॥ २० ॥

कह लंकेस कवन तैं कीसा। केहिं के बल घालेहि बन खीसा ॥
 की धौँ श्रवन सुनेहि नहिं मोही। देखउँ अति असंक सठ तोही ॥
 मारे निसिचर केहिं अपराधा। कहु सठ तोहि न प्रान कइ बाधा ॥
 सुन रावन ब्रह्मांड निकाया। पाइ जासु बल बिरचित माया ॥
 जाकें बल बिरंचि हरि ईसा। पालत सुजत हरत दससीसा।
 जा बल सीस धरत सहसानन। अंडकोस समेत गिरि कानन ॥
 धरइ जो बिबिध देह सुरत्राता। तुम्ह ते सठन्ह सिखावनु दाता।
 हर कोदंड कठिन जेहि भंजा। तेहि समेत नृप दल मद गंजा ॥
 खर दूषन त्रिसिरा अरु बाली। बधे सकल अतुलित बलसाली ॥

दो. जाके बल लवलेस तैं जितेहु चराचर झारि।

तासु दूत मैं जा करि हरि आनेहु प्रिय नारि ॥ २१ ॥

जानउँ मैं तुम्हारि प्रभुताई। सहसबाहु सन परी लराई ॥
 समर बालि सन करि जसु पावा। सुनि कपि बचन बिहसि बिहरावा ॥
 खायउँ फल प्रभु लागी भूँखा। कपि सुभाव तें तोरेउँ रूखा ॥
 सब कें देह परम प्रिय स्वामी। मारहिं मोहि कुमारग गामी ॥
 जिन्ह मोहि मारा ते मैं मारे। तेहि पर बाँधेउ तनयँ तुम्हारे ॥
 मोहि न कछु बाँधे कइ लाजा। कीन्ह चहउँ निज प्रभु कर काजा ॥
 बिनती करउँ जोरि कर रावन। सुनहु मान तजि मोर सिखावन ॥
 देखहु तुम्ह निज कुलहि विचारी। भ्रम तजि भजहु भगत भय हारी ॥
 जाकें डर अति काल डेराई। जो सुर असुर चराचर खाई ॥
 तासों बयरु कबहुँ नहिं कीजै। मोरे कहें जानकी दीजै ॥

दो. प्रनतपाल रघुनायक करुना सिंधु खरारि।

गएँ सरन प्रभु राखिहैं तव अपराध बिसारि ॥ २२ ॥

राम चरन पंकज उर धरहू। लंका अचल राज तुम्ह करहू ॥
 रिषि पुलिस्त जसु विमल मंयका। तेहि ससि महुँ जनि होहु कलंका ॥
 राम नाम बिनु गिरा न सोहा। देखु विचारि त्यागि मद मोहा ॥
 बसन हीन नहिं सोह सुरारी। सब भूषण भूषित बर नारी ॥
 राम विमुख संपति प्रभुताई। जाइ रही पाई बिनु पाई ॥
 सजल मूल जिन्ह सरितन्ह नाहीं। बरषि गए पुनि तबहिं सुखाहीं ॥
 सुनु दसकंठ कहउँ पन रोपी। विमुख राम त्राता नहिं कोपी ॥
 संकर सहस बिष्नु अज तोही। सकहिं न राखि राम कर द्रोही ॥

दो. मोहमूल बहु सूल प्रद त्यागहु तम अभिमान।

भजहु राम रघुनायक कृपा सिंधु भगवान ॥ २३ ॥

जदपि कहि कपि अति हित बानी। भगति बिबेक बिरति नय सानी ॥
 बोला बिहसि महा अभिमानी। मिला हमहि कपि गुर बड ग्यानी ॥
 मृत्यु निकट आई खल तोही। लागेसि अधम सिखावन मोही ॥
 उलटा होइहि कह हनुमाना। मतिभ्रम तोर प्रगट मैं जाना ॥
 सुनि कपि बचन बहुत खिसिआना। बेगि न हरहुँ मूढ कर प्राना ॥
 सुनत निसाचर मारन धाप। सचिवन्ह सहित बिभीषनु आप।
 नाइ सीस करि बिनय बहूता। नीति बिरोध न मारिअ दूता ॥

आन दंड कछु करिअ गोसाँई। सबहीं कहा मंत्र भल भाई ॥
सुनत बिहसि बोला दसकंधर। अंग भंग करि पठइअ बंदर ॥
दो. कपि कें ममता पूँछ पर सबहि कहउँ समुझाइ।
तेल बोरि पट बाँधि पुनि पावक देहु लगाइ ॥ २४ ॥

पूँछहीन बानर तहँ जाइहि। तब सठ निज नाथहि लइ आइहि ॥
जिन्ह कै कीन्हसि बहुत बडाई। देखेउँमैं तिन्ह कै प्रभुताई ॥
बचन सुनत कपि मन मुसुकाना। भइ सहाय सारद मैं जाना ॥
जातुधान सुनि रावन बचना। लागे रचै मूढ सोइ रचना ॥
रहा न नगर बसन घृत तेला। बाढी पूँछ कीन्ह कपि खेला ॥
कौतुक कहँ आए पुरवासी। मारहिं चरन करहिं बहु हाँसी ॥
बाजहिं ढोल देहिं सब तारी। नगर फेरि पुनि पूँछ प्रजारी ॥
पावक जरत देखि हनुमंता। भयउ परम लघु रूप तुरंता ॥
निबुकि चढेउ कपि कनक अटारीं। भई समीत निसाचर नारीं ॥
दो. हरि प्रेरित तेहि अवसर चले मरुत उनचास।

अट्टहास करि गर्जा कपि बढि लाग अकास ॥ २५ ॥

देह बिसाल परम हरुआई। मंदिर तें मंदिर चढ धाई ॥
जरइ नगर भा लोग बिहाला। झपट लपट बहु कोटि कराला ॥
तात मातु हा सुनिअ पुकारा। एहि अवसर को हमहि उबारा ॥
हम जो कहा यह कपि नहिं होई। बानर रूप धरें सुर कोई ॥
साधु अवग्या कर फलु ऐसा। जरइ नगर अनाथ कर जैसा ॥
जारा नगरु निमिष एक माहीं। एक बिभीषन कर गृह नाहीं ॥
ता कर दूत अनल जेहिं सिरिजा। जरा न सो तेहि कारन गिरिजा ॥
उलटि पलटि लंका सब जारी। कूदि परा पुनि सिंधु मझारी ॥

दो. पूँछ बुझाइ खोइ श्रम धरि लघु रूप बहोरि।

जनकसुता के आगें ठाढ भयउ कर जोरि ॥ २६ ॥

मातु मोहि दीजे कछु चीन्हा। जैसें रघुनायक मोहि दीन्हा ॥
चूडामनि उतारि तब दयऊ। हरष समेत पवनसुत लयऊ ॥
कहेहु तात अस मोर प्रनामा। सब प्रकार प्रभु पूरनकामा ॥
दीन दयाल विरिदु संभारी। हरहु नाथ मम संकट भारी ॥
तात सक्रसुत कथा सुनाएहु। बान प्रताप प्रभुहि समुझाएहु ॥

मास दिवस महँ नाथु न आवा। तौ पुनि मोहि जिअत नहिं पावा ॥
कहु कपि केहि बिधि राखौं प्राणा। तुम्हहू तात कहत अब जाना ॥
तोहि देखि सीतलि भइ छाती। पुनि मो कहुँ सोइ दिनु सो राती ॥

दो. जनकसुतहि समुझाइ करि बहु बिधि धीरजु दीन्ह।

चरन कमल सिरु नाइ कपि गवनु राम पहिं कीन्ह ॥ २७ ॥

चलत महाधुनि गर्जेसि भारी। गर्भ खवहिं सुनि निसिचर नारी ॥
नाधि सिंधु एहि पारहि आवा। सबद किलकिला कपिन्ह सुनावा ॥
हरषे सब बिलोकि हनुमाना। नूतन जन्म कपिन्ह तब जाना ॥
मुख प्रसन्न तन तेज बिराजा। कीन्हेसि रामचन्द्र कर काजा ॥
मिले सकल अति भए सुखारी। तलफत मीन पाव जिमि बारी ॥
चले हरषि रघुनायक पासा। पूँछत कहत नवल इतिहासा ॥
तब मधुवन भीतर सब आए। अंगद संमत मधु फल खाए ॥
रखवारे जब बरजन लागे। मुष्टि प्रहार हनत सब भागे ॥

दो. जाइ पुकारे ते सब बन उजार जुबराज।

सुनि सुग्रीव हरष कपि करि आए प्रभु काज ॥ २८ ॥

जौं न होति सीता सुधि पाई। मधुवन के फल सकहिं कि खाई ॥
एहि बिधि मन बिचार कर राजा। आइ गए कपि सहित समाजा ॥
आइ सबन्हि नावा पद सीसा। मिलेउ सबन्हि अति प्रेम कपीसा ॥
पूँछी कुसल कुसल पद देखी। राम कृपाँ भा काजु बिसेषी ॥
नाथ काजु कीन्हेउ हनुमाना। राखे सकल कपिन्ह के प्राणा ॥
सुनि सुग्रीव बहुरि तेहि मिलेऊ। कपिन्ह सहित रघुपति पहिं चलेऊ।
राम कपिन्ह जब आवत देखा। किएँ काजु मन हरष बिसेषा ॥
फटिक सिला बैठे द्वौ भाई। परे सकल कपि चरनन्हि जाई ॥

दो. प्रीति सहित सब भेटे रघुपति करुना पुंज।

पूँछी कुसल नाथ अब कुसल देखि पद कंज ॥ २९ ॥

जामवंत कह सुनु रघुराया। जा पर नाथ करहु तुम्ह दाया ॥
ताहि सदा सुभ कुसल निरंतर। सुर नर मुनि प्रसन्न ता ऊपर ॥
सोइ बिजई विनई गुन सागर। तासु सुजसु त्रेलोक उजागर ॥
प्रभु कीं कृपा भयउ सबु काजू। जन्म हमार सुफल भा आजू ॥
नाथ पवनसुत कीन्हि जो करनी। सहसहुँ मुख न जाइ सो बरनी ॥

पवनतनय के चरित सुहाए। जामवंत रघुपतिहि सुनाए ॥
सुनत कृपानिधि मन अति भाए। पुनि हनुमान हरषि हियँ लाए ॥
कहहु तात केहि भाँति जानकी। रहति करति रच्छा स्वप्राण की ॥

दो. नाम पाहरु दिवस निसि ध्यान तुम्हार कपाट।

लोचन निज पद जंत्रित जाहिँ प्राण केहिँ बाट ॥ ३० ॥

चलत मोहिँ चूडामनि दीन्ही। रघुपति हृदयँ लाइ सोइ लीन्ही ॥
नाथ जुगल लोचन भरि बारी। बचन कहे कछु जनककुमारी ॥
अनुज समेत गहेहु प्रभु चरना। दीन बंधु प्रनतारति हरना ॥
मन क्रम बचन चरन अनुरागी। केहिँ अपराध नाथ हौँ त्यागी ॥
अवगुन एक मोर मैं माना। बिछुरत प्राण न कीन्ह पयाना ॥
नाथ सो नयनन्हि को अपराधा। निसरत प्राण करिहिँ हठि बाधा ॥
बिरह अगिनि तनु तूल समीरा। स्वास जरइ छन माहिँ सरीरा ॥
नयन स्रवहिँ जलु निज हित लागी। जरैँ न पाव देह बिरहागी।
सीता के अति विपति बिसाला। बिनहिँ कहें भलि दीनदयाला ॥

दो. निमिष निमिष करुनानिधि जाहिँ कल्प सम बीति।

बेगिँ चलिय प्रभु आनिअ भुज बल खल दल जीति ॥ ३१ ॥

सुनि सीता दुख प्रभु सुख अयना। भरि आए जल राजिव नयना ॥
बचन काँय मन मम गति जाही। सपनेहुँ बूझिअ विपति कि ताही ॥
कह हनुमंत विपति प्रभु सोई। जब तव सुमिरन भजन न होई ॥
केतिक बात प्रभु जातुधान की। रिपुहिँ जीति आनिबी जानकी ॥
सुनु कपि तोहिँ समान उपकारी। नहिँ कोउ सुर नर मुनि तनुधारी ॥
प्रति उपकार करौँ का तोरा। सनमुख होइ न सकत मन मोरा ॥
सुनु सुत उरिन मैं नाहीं। देखेउँ करि बिचार मन माहीं ॥
पुनि पुनि कपिहिँ चितव सुरत्राता। लोचन नीर पुलक अति गाता ॥

दो. सुनि प्रभु बचन बिलोकि मुख गात हरषि हनुमंत।

चरन परेउ प्रेमाकुल त्राहिँ त्राहिँ भगवंत ॥ ३२ ॥

बार बार प्रभु चहइ उठावा। प्रेम मगन तेहिँ उठव न भावा ॥
प्रभु कर पंकज कपि कें सीसा। सुमिरि सो दसा मगन गौरीसा ॥
सावधान मन करि पुनि संकर। लागे कहन कथा अति सुंदर ॥
कपि उठाइ प्रभु हृदयँ लगावा। कर गहिँ परम निकट बैठावा ॥

कहु कपि रावन पालित लंका। केहि विधि दहेउ दुर्ग अति बंका ॥
 प्रभु प्रसन्न जाना हनुमाना। बोला बचन बिगत अभिमाना ॥
 साखा मृग के बडि मनुसाई। साखा तें साखा पर जाई ॥
 नाधि सिंधु हाटकपुर जारा। निसिचर गन विधि बिपिन उजारा।
 सो सब तव प्रताप रघुराई। नाथ न कछू मोरि प्रभुताई ॥

दो. ता कहूँ प्रभु कछु अगम नहिं जा पर तुम्ह अनुकुल।
 तब प्रभावँ बडवानलहिं जारि सकइ खलु तूल ॥ ३३ ॥

नाथ भगति अति सुखदायनी। देहु कृपा करि अनपायनी ॥
 सुनि प्रभु परम सरल कपि बानी। एवमस्तु तब कहेउ भवानी ॥
 उमा राम सुभाउ जेहिं जाना। ताहि भजनु तजि भाव न आना ॥
 यह संवाद जासु उर आवा। रघुपति चरन भगति सोइ पावा ॥
 सुनि प्रभु बचन कहहिं कपिवृंदा। जय जय जय कृपाल सुखकंदा ॥
 तब रघुपति कपिपतिहि बोलावा। कहा चलै कर करहु बनावा ॥
 अब बिलंबु केहि कारन कीजे। तुरत कपिन्ह कहूँ आयसु दीजे ॥
 कौतुक देखि सुमन बहु बरषी। नभ तें भवन चले सुर हरषी ॥

दो. कपिपति बेगि बोलाए आए जूथप जूथ।
 नाना बरन अतुल बल बानर भालु बरूथ ॥ ३४ ॥

प्रभु पद पंकज नावहिं सीसा। गरजहिं भालु महाबल कीसा ॥
 देखी राम सकल कपि सेना। चितइ कृपा करि राजिव नैना ॥
 राम कृपा बल पाइ कर्पिंदा। भए पच्छजुत मनहुँ गिरिदा ॥
 हरषि राम तब कीन्ह पयाना। सगुन भए सुंदर सुभ नाना ॥
 जासु सकल मंगलमय कीती। तासु पयान सगुन यह नीती ॥
 प्रभु पयान जाना बैदेहीं। फरकि बाम अँग जनु कहि देहीं ॥
 जोइ जोइ सगुन जानकिहि होई। असगुन भयउ रावनहि सोई ॥
 चला कटकु को बरनै पारा। गर्जहि बानर भालु अपारा ॥
 नख आयुध गिरि पादपधारी। चले गगन महि इच्छाचारी ॥
 केहरिनाद भालु कपि करहीं। डगमगाहिं दिग्गज चिक्करहीं ॥

छं. चिक्करहिं दिग्गज डोल महि गिरि लोल सागर खरभरे।
 मन हरष सभ गंधर्व सुर मुनि नाग किन्नर दुख टरे ॥
 कटकटहिं मर्कट बिकट भट बहु कोटि कोटिन्ह धावहीं।

जय राम प्रबल प्रताप कोसलनाथ गुन गन गावहीं ॥ १ ॥

सहि सक न भार उदार अहिपति बार बारहि मोहई।
गह दसन पुनि पुनि कमठ पृष्ठ कठोर सो किमि सोहई ॥
रघुबीर रुचिर प्रयान प्रस्थिति जानि परम सुहावनी।
जनु कमठ खर्पर सर्पराज सो लिखत अबिचल पावनी ॥ २ ॥

दो. एहि बिधि जाइ कृपानिधि उतरे सागर तीर।

जहँ तहँ लागे खान फल भालु बिपुल कपि बीर ॥ ३५ ॥

उहाँ निसाचर रहहिँ ससंका। जब ते जाारि गयउ कपि लंका ॥
निज निज गृहँ सब करहिँ बिचारा। नहिँ निसिचर कुल केर उबारा ॥
जासु दूत बल बरनि न जाई। तेहि आएँ पुर कवन भलाई ॥
दूतन्हि सन सुनि पुरजन बानी। मंदोदरी अधिक अकुलानी ॥
रहसि जोरि कर पति पग लागी। बोली बचन नीति रस पागी ॥
कंत करष हरि सन परिहरहू। मोर कहा अति हित हियँ धरहु ॥
समुझत जासु दूत कइ करनी। खवहीं गर्भ रजनीचर धरनी ॥
तासु नारि निज सचिव बोलाई। पठवहु कंत जो चहहु भलाई ॥
तब कुल कमल बिपिन दुखदाई। सीता सीत निसा सम आई ॥
सुनहु नाथ सीता विनु दीन्हें। हित न तुम्हार संभु अज कीन्हें ॥

दो. -राम बान अहि गन सरिस निकर निसाचर भेक।

जब लागि ग्रसत न तब लागि जतनु करहु तजि टेक ॥ ३६ ॥

श्रवन सुनी सठ ता करि बानी। बिहसा जगत विदित अभिमानी ॥
सभय सुभाउ नारि कर साचा। मंगल महुँ भय मन अति काचा ॥
जौ आवइ मर्कट कटकाई। जिअहिँ बिचारे निसिचर खाई ॥
कंपहिँ लोकप जाकी त्रासा। तासु नारि समीत बडि हासा ॥
अस कहि बिहसि ताहि उर लाई। चलेउ सभौ ममता अधिकाई ॥
मंदोदरी हृदयँ कर चिंता। भयउ कंत पर बिधि बिपरीता ॥
बैठेउ सभौ खवारि असि पाई। सिंधु पार सेना सब आई ॥
बूझेसि सचिव उचित मत कहहू। ते सब हँसे मष्ट करि रहहू ॥
जितेहु सुरासुर तब श्रम नाही। नर बानर केहि लेखे माही ॥

दो. सचिव बैद गुर तीनि जौँ प्रिय बोलाहिँ भय आस।

राज धर्म तन तीनि कर होइ बेगिहीं नास ॥ ३७ ॥

सोइ रावन कहँ बनि सहाई। अस्तुति करहिँ सुनाइ सुनाई ॥
 अवसर जानि विभीषनु आवा। भ्राता चरन सीसु तेहिँ नावा ॥
 पुनि सिरु नाइ बैठ निज आसन। बोला बचन पाइ अनुसासन ॥
 जौ कृपाल पूँछिहु मोहि बाता। मति अनुरूप कहउँ हित ताता ॥
 जो आपन चाहै कल्याना। सुजसु सुमति सुभ गति सुख नाना ॥
 सो परनारि लिलार गोसाई। तजउ चउथि के चंद कि नाई ॥
 चौदह भुवन एक पति होई। भूतद्रोह तिष्टइ नहिँ सोई ॥
 गुन सागर नागर नर जोऊ। अलप लोभ भल कहइ न कोऊ ॥

दो. काम क्रोध मद लोभ सब नाथ नरक के पंथ।

सब परिहरि रघुबीरहि भजहु भजहिँ जेहि संत ॥ ३८ ॥

तात राम नहिँ नर भूपाला। भुवनेस्वर कालहु कर काला ॥
 ब्रह्म अनामय अज भगवंता। व्यापक अजित अनादि अनंता ॥
 गो द्विज धेनु देव हितकारी। कृपासिंधु मानुष तनुधारी ॥
 जन रंजन भंजन खल ब्राता। वेद धर्म रच्छक सुनु भ्राता ॥
 ताहि बयरु तजि नाइअ माथा। प्रनतारति भंजन रघुनाथा ॥
 देहु नाथ प्रभु कहँ बैदेही। भजहु राम बिनु हेतु सनेही ॥
 सरन गएँ प्रभु ताहु न त्यागा। बिस्व द्रोह कृत अघ जेहि लागा ॥
 जासु नाम त्रय ताप नसावन। सोइ प्रभु प्रगट समुद्धु जियँ रावन ॥

दो. बार बार पद लागउँ बिनय करउँ दससीस।

परिहरि मान मोह मद भजहु कोसलाधीस ॥ ३९(क) ॥

मुनि पुलस्ति निज सिष्य सन कहि पठई यह बात।

तुरत सो मैं प्रभु सन कही पाइ सुअवसरु तात ॥ ३९(ख) ॥

माल्यवंत अति सचिव सयाना। तासु बचन सुनि अति सुख माना ॥
 तात अनुज तव नीति बिभूषन। सो उर धरहु जो कहत बिभीषन ॥
 रिपु उतकरष कहत सठ दोऊ। दूरि न करहु इहाँ हइ कोऊ ॥
 माल्यवंत गृह गयउ बहोरी। कहइ बिभीषनु पुनि कर जोरी ॥
 सुमति कुमति सब कें उर रहहीं। नाथ पुरान निगम अस कहहीं ॥
 जहाँ सुमति तहँ संपति नाना। जहाँ कुमति तहँ बिपति निदाना ॥
 तव उर कुमति बसी बिपरीता। हित अनहित मानहु रिपु प्रीता ॥
 कालराति निसिचर कुल केरी। तेहि सीता पर प्रीति घनेरी ॥

दो. तात चरन गहि मागउँ राखहु मोर दुलार।

सीत देहु राम कहँ अहित न होइ तुम्हार ॥ ४० ॥

बुध पुरान श्रुति संमत बानी। कही विभीषन नीति बखानी ॥
 सुनत दसानन उठा रिसाई। खल तोहि निकट मुत्यु अब आई ॥
 जिअसि सदा सठ मोर जिआवा। रिपु कर पच्छ मूढ तोहि भावा ॥
 कहसि न खल अस को जग माहीं। भुज बल जाहि जिता मैं नाही ॥
 मम पुर बसि तपसिन्ह पर प्रीती। सठ मिलु जाइ तिन्हहि कहु नीती ॥
 अस कहि कीन्हेसि चरन प्रहारा। अनुज गहे पद बारहिं बारा ॥
 उमा संत कइ इहइ बडाई। मंद करत जो करइ भलाई ॥
 तुम्ह पितु सरिस भलेहिं मोहि मारा। रामु भजें हित नाथ तुम्हारा ॥
 सचिव संग लै नभ पथ गयऊ। सबहि सुनाइ कहत अस भयऊ ॥
 दो०=रामु सत्यसंकल्प प्रभु सभा कालवस तोरि।

मै रघुवीर सरन अब जाउँ देहु जनि खोरि ॥ ४१ ॥

अस कहि चला विभीषनु जबहीं। आयूहीन भए सब तबहीं ॥
 साधु अवग्या तुरत भवानी। कर कल्यान अखिल कै हानी ॥
 रावन जबहिं विभीषन त्यागा। भयउ विभव विनु तबहिं अभागा ॥
 चलेउ हरषि रघुनायक पाहीं। करत मनोरथ बहु मन माहीं ॥
 देखिहउँ जाइ चरन जलजाता। अरुन मृदुल सेवक सुखदाता ॥
 जे पद परसि तरी रिषिनारी। दंडक कानन पावनकारी ॥
 जे पद जनकसुताँ उर लाए। कपट कुरंग संग धर धाए ॥
 हर उर सर सरोज पद जेई। अहोभाग्य मै देखिहउँ तेई ॥
 दो०= जिन्ह पायन्ह के पादुकन्हि भरतु रहे मन लाइ।

ते पद आजु विलोकिहउँ इन्ह नयनन्हि अब जाइ ॥ ४२ ॥

एहि विधि करत सप्रेम विचारा। आयउ सपदि सिंधु एहिं पारा ॥
 कपिन्ह विभीषनु आवत देखा। जाना कोउ रिपु दूत विसेषा ॥
 ताहि राखि कपीस पहिं आए। समाचार सब ताहि सुनाए ॥
 कह सुग्रीव सुनहु रघुराई। आवा मिलन दसानन भाई ॥
 कह प्रभु सखा बूझिए काहा। कहइ कपीस सुनहु नरनाहा ॥
 जानि न जाइ निसाचर माया। कामरूप केहि कारन आया ॥
 भेद हमार लेन सठ आवा। राखिअ बाँधि मोहि अस भावा ॥

सखा नीति तुम्ह नीकि बिचारी। मम पन सरनागत भयहारी ॥
सुनि प्रभु बचन हरष हनुमाना। सरनागत बच्छल भगवाना ॥
दो०=सरनागत कहूँ जे तजहिँ निज अनहित अनुमानि।

ते नर पावँर पापमय तिन्हहि बिलोकत हानि ॥ ४३ ॥

कोटि विप्र बध लागहि जाहू। आपँ सरन तजउँ नहिँ ताहू ॥
सनमुख होइ जीव मोहि जबहीं। जन्म कोटि अघ नासहिँ तबहीं ॥
पापवंत कर सहज सुभाऊ। भजनु मोर तेहिँ भाव न काऊ ॥
जौँ पै दुष्टहृदय सोइ होई। मोरें सनमुख आव कि सोई ॥
निर्मल मन जन सो मोहि पावा। मोहि कपट छल छिद्र न भावा ॥
भेद लेन पठवा दससीसा। तबहुँ न कछु भय हानि कपीसा ॥
जग महुँ सखा निसाचर जेते। लछिमनु हनइ निमिष महुँ तेते ॥
जौँ सभीत आवा सरनाई। रखिहउँ ताहिँ प्रान की नाई ॥
दो०=उभय भाँति तेहिँ आनहुँ हँसि कह कृपानिकेत।

जय कृपाल कहि चले अंगद हनू समेत ॥ ४४ ॥

सादर तेहिँ आगें करि बानर। चले जहाँ रघुपति करुनाकर ॥
दूरिहि ते देखे द्वौ भ्राता। नयनानंद दान के दाता ॥
बहुरि राम छविधाम बिलोकी। रहेउ ठटुकि एकटक पल रोकी ॥
भुज प्रलंब कंजारुन लोचन। स्यामल गात प्रनत भय मोचन ॥
सिंघ कंध आयत उर सोहा। आनन अमित मदन मन मोहा ॥
नयन नीर पुलकित अति गाता। मन धरि धीर कही मृदु बाता ॥
नाथ दसानन कर मैं भ्राता। निसिचर बंस जनम सुरत्राता ॥
सहज पापप्रिय तामस देहा। जथा उलूकहि तम पर नेहा ॥

दो. श्रवन सुजसु सुनि आयउँ प्रभु भंजन भव भीर।

त्राहि त्राहि आरति हरन सरन सुखद रघुबीर ॥ ४५ ॥

अस कहि करत दंडवत देखा। तुरत उठे प्रभु हरष बिसेषा ॥
दीन बचन सुनि प्रभु मन भावा। भुज विसाल गहि हृदयँ लगावा ॥
अनुज सहित मिलि ढिग बैठारी। बोले बचन भगत भयहारी ॥
कहु लंकेस सहित परिवारा। कुसल कुठाहर बास तुम्हारा ॥
खल मंडलीं बसहु दिनु राती। सखा धरम निबहइ केहि भाँती ॥
मैं जानउँ तुम्हारि सब रीती। अति नय निपुन न भाव अनीती ॥

बरु भल बास नरक कर ताता। दुष्ट संग जनि देइ बिधाता ॥
अब पद देखि कुसल रघुराया। जौं तुम्ह कीन्ह जानि जन दाया ॥

दो. तब लागि कुसल न जीव कहूँ सपनेहूँ मन विश्राम।
जब लागि भजत न राम कहूँ सोक धाम तजि काम ॥ ४६ ॥

तब लागि हृदयँ बसत खल नाना। लोभ मोह मच्छर मद माना ॥
जब लागि उर न बसत रघुनाथा। धरें चाप सायक कटि भाथा ॥
ममता तरुन तमी अँधिआरी। राग द्वेष उलूक सुखकारी ॥
तब लागि बसति जीव मन माहीं। जब लागि प्रभु प्रताप रवि नाहीं ॥
अब मैं कुसल मिटे भय भारे। देखि राम पद कमल तुम्हारे ॥
तुम्ह कृपाल जा पर अनुकूला। ताहि न ब्याप त्रिविध भव सूला ॥
मैं निसिचर अति अधम सुभाऊ। सुभ आचरनु कीन्ह नहिं काऊ ॥
जासु रूप मुनि ध्यान न आवा। तेहिं प्रभु हरषि हृदयँ मोहि लावा ॥

दो. -अहोभाग्य मम अमित अति राम कृपा सुख पुंज।
देखेउँ नयन विरंचि सिब सेव्य जुगल पद कंज ॥ ४७ ॥

सुनहु सखा निज कहउँ सुभाऊ। जान भुसुंढि संभु गिरिजाऊ ॥
जौं नर होइ चराचर द्रोही। आवे सभय सरन तकि मोही ॥
तजि मद मोह कपट छल नाना। करउँ सद्य तेहि साधु समाना ॥
जननी जनक बंधु सुत दारा। तनु धनु भवन सुहृद परिवारा ॥
सब कै ममता ताग बटोरी। मम पद मनहि बाँध बरि डोरी ॥
समदरसी इच्छा कछु नाहीं। हरष सोक भय नहिं मन माहीं ॥
अस सज्जन मम उर बस कैसेँ। लोभी हृदयँ बसइ धनु जैसेँ ॥
तुम्ह सारिखे संत प्रिय मोरें। धरउँ देह नहिं आन निहोरें ॥

दो. सगुन उपासक परहित निरत नीति दृढ नेम।
ते नर प्रान समान मम जिन्ह कें द्विज पद प्रेम ॥ ४८ ॥

सुनु लंकेस सकल गुन तोरें। तातें तुम्ह अतिसय प्रिय मोरें ॥
राम बचन सुनि बानर जूथा। सकल कहहिं जय कृपा बरूथा ॥
सुनत विभीषनु प्रभु कै बानी। नहिं अघात श्रवनामृत जानी ॥
पद अंबुज गहि बारहिं बारा। हृदयँ समात न प्रेमु अपारा ॥
सुनहु देव सचराचर स्वामी। प्रनतपाल उर अंतरजामी ॥
उर कछु प्रथम बासना रही। प्रभु पद प्रीति सरित सो बही ॥

अब कृपाल निज भगति पावनी। देहु सदा सिव मन भावनी ॥
 एवमस्तु कहि प्रभु रनधीरा। मागा तुरत सिंधु कर नीरा ॥
 जदपि सरखा तव इच्छा नाहीं। मोर दरसु अमोघ जग माहीं ॥
 अस कहि राम तिलक तेहि सारा। सुमन बृष्टि नभ भई अपारा ॥

दो. रावन क्रोध अनल निज स्वास समीर प्रचंड।

जरत विभीषनु राखेउ दीन्हेहु राजु अखंड ॥ ४९(क) ॥

जो संपति सिव रावनहि दीन्हि दिऐँ दस माथ।

सोइ संपदा विभीषनहि सकुचि दीन्ह रघुनाथ ॥ ४९(ख) ॥

अस प्रभु छाडि भजहिं जे आना। ते नर पसु बिनु पूँछ विषाना ॥
 निज जन जानि ताहि अपनावा। प्रभु सुभाव कपि कुल मन भावा ॥
 पुनि सर्वग्य सर्व उर बासी। सर्वरूप सब रहित उदासी ॥
 बोले बचन नीति प्रतिपालक। कारन मनुज दनुज कुल घालक ॥
 सुनु कपीस लंकापति बीरा। केहि बिधि तरिअ जलधि गंभीरा ॥
 संकुल मकर उरग झष जाती। अति अगाध दुस्तर सब भाँती ॥
 कह लंकेस सुनहु रघुनायक। कोटि सिंधु सोषक तव सायक ॥
 जद्यपि तदपि नीति असि गाई। बिनय करिअ सागर सन जाई ॥

दो. प्रभु तुम्हार कुलगुर जलधि कहिहि उपाय विचारि।

बिनु प्रयास सागर तरिहि सकल भालु कपि धारि ॥ ५० ॥

सखा कही तुम्ह नीकि उपाई। करिअ दैव जौँ होइ सहाई ॥
 मंत्र न यह लछिमन मन भावा। राम बचन सुनि अति दुख पावा ॥
 नाथ दैव कर कवन भरोसा। सोषिअ सिंधु करिअ मन रोसा ॥
 कादर मन कहूँ एक अधारा। दैव दैव आलसी पुकारा ॥
 सुनत बिहसि बोले रघुबीरा। ऐसेहिं करब धरहु मन धीरा ॥
 अस कहि प्रभु अनुजहि समुझाई। सिंधु समीप गए रघुराई ॥
 प्रथम प्रनाम कीन्ह सिरु नाई। बैठे पुनि तट दर्भ डसाई ॥
 जबहिं विभीषन प्रभु पहिं आए। पाछें रावन दूत पठाए ॥

दो. सकल चरित तिन्ह देखे धरें कपट कपि देह।

प्रभु गुन हृदयँ सराहहिं सरनागत पर नेह ॥ ५१ ॥

प्रगट बखानहिं राम सुभाऊ। अति सप्रेम गा बिसरि दुराऊ ॥
 रिपु के दूत कपिन्ह तब जाने। सकल बाँधि कपीस पहिं आने ॥

कह सुग्रीव सुनहु सब बानर। अंग भंग करि पठवहु निसिचर ॥
 सुनि सुग्रीव बचन कपि धाए। बाँधि कटक चहु पास फिराए ॥
 बहु प्रकार मारन कपि लागे। दीन पुकारत तदपि न त्यागे ॥
 जो हमार हर नासा काना। तेहि कोसलाधीस कै आना ॥
 सुनि लछिमन सब निकट बोलाए। दया लागि हँसि तुरत छोडाए ॥
 रावन कर दीजहु यह पाती। लछिमन बचन बाचु कुलघाती ॥

दो. कहेहु मुखागर मूढ सन मम संदेसु उदार।

सीता देइ मिलेहु न त आवा काल तुम्हार ॥ ५२ ॥

तुरत नाइ लछिमन पद माथा। चले दूत बरनत गुन गाथा ॥
 कहत राम जसु लंकाँ आए। रावन चरन सीस तिन्ह नाए ॥
 बिहसि दसानन पूँछी बाता। कहसि न सुक आपनि कुसलाता ॥
 पुनि कहु खबरि विभीषन केरी। जाहि मृत्यु आई अति नेरी ॥
 करत राज लंका सठ त्यागी। होइहि जब कर कीट अभागी ॥
 पुनि कहु भालु कीस कटकाई। कठिन काल प्रेरित चलि आई ॥
 जिन्ह के जीवन कर रखवारा। भयउ मृदुल चित सिंधु बिचारा ॥
 कहु तपसिन्ह कै बात बहोरी। जिन्ह के हृदयँ त्रास अति मोरी ॥

दो. -की भइ भेंट कि फिरि गए श्रवन सुजसु सुनि मोर।

कहसि न रिपु दल तेज बल बहुत चकित चित तोर ॥ ५३ ॥

नाथ कृपा करि पूँछेहु जैसें। मानहु कहा क्रोध तजि तैसें ॥
 मिला जाइ जब अनुज तुम्हारा। जातहिँ राम तिलक तेहि सारा ॥
 रावन दूत हमहि सुनि काना। कपिन्ह बाँधि दीन्हे दुख नाना ॥
 श्रवन नासिका काटै लागे। राम सपथ दीन्हे हम त्यागे ॥
 पूँछिहु नाथ राम कटकाई। बदन कोटि सत बरनि न जाई ॥
 नाना बरन भालु कपि धारी। विकटानन बिसाल भयकारी ॥
 जेहिँ पुर दहेउ हतेउ सुत तोरा। सकल कपिन्ह महाँ तेहि बलु थोरा ॥
 अमित नाम भट कठिन कराला। अमित नाग बल विपुल बिसाला ॥

दो. द्विबिद मयंद नील नल अंगद गद विकटासि।

दधिमुख केहरि निसठ सठ जामवंत बलरासि ॥ ५४ ॥

ए कपि सब सुग्रीव समाना। इन्ह सम कोटिन्ह गनइ को नाना ॥
 राम कृपाँ अतुलित बल तिन्हहीं। तृन समान त्रेलोकहि गनहीं ॥

अस मैं सुना श्रवन दसकंधर। पदुम अठारह जूथप बंदर ॥
 नाथ कटक महुँ सो कपि नाहीं। जो न तुम्हहि जीतै रन माहीं ॥
 परम क्रोध मीजहिँ सब हाथा। आयसु पै न देहिँ रघुनाथा ॥
 सोषहिँ सिंधु सहित झष ब्याला। पूरहीं न त भरि कुधर बिसाला ॥
 मर्दि गर्द मिलवहिँ दससीसा। ऐसेइ बचन कहहिँ सब कीसा ॥
 गर्जहिँ तर्जहिँ सहज असंका। मानहु ग्रसन चहत हहिँ लंका ॥

दो. -सहज सूर कपि भालु सब पुनि सिर पर प्रभु राम।

रावन काल कोटि कहु जीति सकहिँ संग्राम ॥ ५५ ॥

राम तेज बल बुधि विपुलाई। सेष सहस सत सकहिँ न गाई ॥
 सक सर एक सोषि सत सागर। तब भ्रातहि पूँछेउ नय नागर ॥
 तासु बचन सुनि सागर पाहीं। मागत पंथ कृपा मन माहीं ॥
 सुनत बचन बिहसा दससीसा। जौँ असि मति सहाय कृत कीसा ॥
 सहज भीरु कर बचन दृढाई। सागर सन ठानी मचलाई ॥
 मूढ मृषा का करसि बड़ाई। रिपु बल बुद्धि थाह मैं पाई ॥
 सचिव सभित विभीषन जाकें। विजय बिभूति कहाँ जग ताकें ॥
 सुनि खल बचन दूत रिस बाढी। समय बिचारि पत्रिका काढी ॥
 रामानुज दीन्ही यह पाती। नाथ बचाइ जुडावहु छाती ॥
 बिहसि बाम कर लीन्ही रावन। सचिव बोलि सठ लाग बचावन ॥

दो. -बातन्ह मनहि रिझाइ सठ जनि घालसि कुल खीस।

राम बिरोध न उबरसि सरन बिष्नु अज ईस ॥ ५६(क) ॥

की तजि मान अनुज इव प्रभु पद पंकज भृंग।

होहि कि राम सरानल खल कुल सहित पतंग ॥ ५६(ख) ॥

सुनत सभय मन मुख मुसुकाई। कहत दसानन सबहि सुनाई ॥
 भूमि परा कर गहत अकासा। लघु तापस कर बाग बिलासा ॥
 कह सुक नाथ सत्य सब बानी। समुझहु छाडि प्रकृति अभिमानी ॥
 सुनहु बचन मम परिहरि क्रोधा। नाथ राम सन तजहु विरोधा ॥
 अति कोमल रघुवीर सुभाऊ। जद्यपि अखिल लोक कर राऊ ॥
 मिलत कृपा तुम्ह पर प्रभु करिही। उर अपराध न एकउ धरिही ॥
 जनकसुता रघुनाथहि दीजे। एतना कहा मोर प्रभु कीजे।
 जब तेहिँ कहा देन बैदेही। चरन प्रहार कीन्ह सठ तेही ॥

नाइ चरन सिरु चला सो तहाँ। कृपासिंधु रघुनायक जहाँ ॥
करि प्रनामु निज कथा सुनाई। राम कृपाँ आपनि गति पाई ॥
रिषि अगस्ति कीं साप भवानी। राछस भयउ रहा मुनि ग्यानी ॥
बंदि राम पद बारहिं बारा। मुनि निज आश्रम कहूँ पगु धारा ॥

दो. बिनय न मानत जलधि जड गए तीन दिन बीति।

बोले राम सकोप तब भय बिनु होइ न प्रीति ॥ ५७ ॥

लछिमन बान सरासन आनू। सोषौं बारिधि बिसिख कृसानू ॥
सठ सन बिनय कुटिल सन प्रीती। सहज कृपन सन सुंदर नीती ॥
ममता रत सन ग्यान कहानी। अति लोभी सन बिरति बखानी ॥
क्रोधिहि सम कामिहि हरि कथा। ऊसर बीज बाँ फल जथा ॥
अस कहि रघुपति चाप चढावा। यह मत लछिमन के मन भावा ॥
संधानेउ प्रभु बिसिख कराला। उठी उदधि उर अंतर ज्वाला ॥
मकर उरग झष गन अकुलाने। जरत जंतु जलनिधि जब जाने ॥
कनक थार भरि मनि गन नाना। बिप्र रूप आयउ तजि माना ॥

दो. काटेहिं पइ कदरी फरइ कोटि जतन कोउ सींच।

बिनय न मान खगोस सुनु डाटेहिं पइ नव नीच ॥ ५८ ॥

सभय सिंधु गहि पद प्रभु केरे। छमहु नाथ सब अवगुन मेरे ॥
गगन समीर अनल जल धरनी। इन्ह कइ नाथ सहज जड करनी ॥
तव प्रेरित मायाँ उपजाए। सृष्टि हेतु सब ग्रंथनि गाए ॥
प्रभु आयसु जेहि कहँ जस अहई। सो तेहि भाँति रहे सुख लहई ॥
प्रभु भल कीन्ही मोहि सिख दीन्ही। मरजादा पुनि तुम्हरी कीन्ही ॥
ढोल गवाँर सूद्र पसु नारी। सकल ताडना के अधिकारी ॥
प्रभु प्रताप मैं जाब सुखाई। उतरिहि कटकु न मोरि बडाई ॥
प्रभु अग्या अपेल श्रुति गाई। करौं सो बेगि जौ तुम्हहि सोहाई ॥

दो. सुनत विनीत बचन अति कह कृपाल मुसुकाइ।

जेहि बिधि उतरै कपि कटकु तात सो कहहु उपाइ ॥ ५९ ॥

नाथ नील नल कपि द्वौ भाई। लरिकाई रिषि आसिष पाई ॥
तिन्ह के परस किएँ गिरि भारे। तरिहहिं जलधि प्रताप तुम्हारे ॥
मैं पुनि उर धरि प्रभुताई। करिहउँ बल अनुमान सहाई ॥
एहि बिधि नाथ पयोधि बँधाइअ। जेहिं यह सुजसु लोक तिहुँ गाइअ ॥

एहि सर मम उत्तर तट बासी। हतहु नाथ खल नर अघ रासी ॥
सुनि कृपाल सागर मन पीरा। तुरतहिं हरी राम रनधीरा ॥
देखि राम बल पौरुष भारी। हरषि पयोनिधि भयउ सुखारी ॥
सकल चरित कहि प्रभुहि सुनावा। चरन बंदि पाथोधि सिधावा ॥

छं. निज भवन गवनेउ सिंधु श्रीरघुपतिहि यह मत भायऊ।
यह चरित कलि मलहर जथामति दास तुलसी गायऊ ॥
सुख भवन संसय समन दवन बिषाद रघुपति गुन गना ॥
तजि सकल आस भरोस गावहि सुनहि संतत सठ मना ॥

दो. सकल सुमंगल दायक रघुनायक गुन गान।
सादर सुनहिं ते तरहिं भव सिंधु बिना जलजान ॥ ६० ॥

मासपारायण, चौबीसवाँ विश्राम

SSSSSSS

इति श्रीमद्रामचरितमानसे सकलकलिकलुषविध्वंसने

पञ्चमः सोपानः समाप्तः ।

(सुन्दरकाण्ड समाप्त)

Shri Ram Charit Manas

pdf was typeset on February 13, 2024

Please send corrections to sanskrit@cheerful.com

